

54 pemain sape di Sarawak catat nama dalam Malaysia Book of Records
Astro Awani
17 Februari 2019

MIRI: Buat pertama kalinya seramai 54 pemain sape pedalaman Sarawak berjaya mencipta sejarah mencatat nama dalam Malaysia Book of Record (MBR) dengan persembahan muzik Sape paling lama, hingga 50 jam.

Acara yang bermula pada Jumaat (15 Feb) dan berakhir hari ini (Ahad) menyaksikan seramai 51 lelaki serta tiga wanita memetik 59 melodi tradisional sape dengan persembahan penutupan dilakukan oleh "Master Sape" Mathew Ngau Jau.

Pengurus Operasi, Kajian dan Pemasaran (MBR) Edwin Yeoh menyerahkan sijil pengiktirafan MBR persembahan muzik Sape terpanjang kepada Naib Presiden Eksekutif Perkhidmatan Korporat, Sarawak Energy Berhad (SEB) Aisah Eden dan Pengarah Penyiaran Sarawak Zainal Abidin Asri Abdul Wahid di Auditorium RTM Miri hari ini.

Dalam sidang media selepas penyampaian sijil, Aisah berharap pada masa hadapan SEB dan RTM dapat mengadakan kerjasama strategik untuk mempromosi kebudayaan etnik yang lain di Sarawak.

Zainal berkata, RTM Sarawak bersedia berkerjasama dengan SEB memandangkan selain sukan, muzik menjadi salah satu platform yang menyatukan rakyat pelbagai kaum

Sape berbentuk seperti gambus panjang bertali empat merupakan alat muzik jenis kordofon yang berasal dari kaum Orang Ulu terutamanya kaum Kenyah dan Kayan di Sarawak.

**© 2019 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/54-pemain-sape-di-sarawak-catat-nama-dalam-malaysia-book-records-198815>